



Federal Republic of Somalia  
Office of the President

SHARCI LR. 001

ANSIXINTA SHARCIGA QOONDADA MIISAANIYADDA 2022<sup>da</sup>

TAARIKH: 13/07/2021

MADAXWEYNAHA J.F.S,

**Markuu arkay:** Qodobka 87 <sup>aad</sup>, Faqradda 1 <sup>aad</sup> iyo Faqradda 2 <sup>aad</sup> ee Dastuurka KMG.

**Markuu arkay:** Qodobka 90 <sup>aad</sup>, Xarafka "q" ee Dastuurka KMG.

**Markuu arkay:** Warqadda Gudoomiyaha Golaha Shacabka GSH/015/B11/22  
taariikh 30/06/2022 kuna saabsan Odoroska Miisaaniyadda Qaranka  
Sanadka 2022.

**Markuu tixgeliyay:** Baahida loo qabo in la ansixiyo lana meel-mariyo Sharcigan.

**Waxa uu Madaxweynuhu soo saaray Sharcigan:**

**Qodobka 1aad**

Laga billaabo marka uu Madaxweynuhu saxiixo Sharcigan, waxa si rasmi ah loo oggolaaday  
Sharciga Qoondada Miisaaniyadda 2022.

**Qodobka 2aad**

Marka uu Madaxweynaha J.F.S saxiixo Sharcigan, waxa lagu soo daabici doonaa Faafinta  
Rasmiga ah ee Jamhuuriyadda Federaalka Soomaaliya.

**Muqdisho: 13/07/2022**

Madaxweynaha J.F.S.  
Mudane Xasan Sheekh Maxamuud



## **XEERKA QOONDAHA MIISAANIYADDA 2022-KA**

**Bayaan Tirsi 00020/2022**

**XEERKA DHAQANGELINTA MIISAANIYADDA SANADKA 2022 EE JAMHUURIYADDA  
FEDARAALKA SOOMALIYA.**

Maadaama, uu qeexayo sharciga maareynta maaliyadda Lr. 17 ee December 25, 2019 in uu Golaha sharci dajintu ansixiyo, dhaqan galiiyana miisaaniyadda Sanadlaha ah.

Maadaama, ay tahay lagama maarmaan in la ansixiyo, lana qaybiyo Miisaaniyadda Dowladda Fedaraalka ee Soomaaliya si ay ugu fuliso hawlaheeda sanad xisaabeedka 2022.

Haddaba, iyadoo laga duulayo qodobka 18<sup>aad</sup> ee sharciga maareynta maaliyadda Lr 17 December 25, 2019 ee Dowladda Federalka Soomaliya, ayaa Golaha Shacabku ansixyey Miisaaniyadda sanadka 2022-ka ee faahfaahinteedu ku lifaaqan tahay halkan iyo xeerka dhaqangelinta Miisaaniyadda ee qodobadiisu hoos ku taxan yihiin: -

### **1. Qaybta Koowaad**

#### **Guud Ahaan**

#### **Cinwaan Gaaban**

Xeerkan oo ka kooban bayaanno qodobeysan, faahfaahinta Miisaaniyadda ayaa waxaa lagu magacaabay “Xeerka Dhaqangelinta Miisaaniyadda sanadka 2022-ka ee tirsi 00020/2022”

#### **1.1 Qeexiid**

Haddii aan si kale loogu fasirin xeerkan dhexdiisa, ereyada soo socda waxay yeelanayaan macnaha mid walba ku hor qeexan: -

1. “Xariiqda-Sare” waxaa loola jeeda dhacdo maaliyadeedka saameynta ku leh hadhaaga lacagaha cadaanka ah”
2. “Qoondayn” waxaa loo la jeedaa amar kasta oo uu Golaha sharci dajintu ku amrayo in lacag laga bixiyo Miisaniyadda duduubka ah.
3. “Ansixin” waxaa loo la jeedaa ayidaadda uu ayido wasiirku, Miisaaniyadda ku diyaarsan walax kharasheedka qaab wafaqsan qoondo Miisaaniyadeedka uu Golaha sharci dajintu sameeyey.
4. “Kharashka Mashaaricda” waxaa loo laa jeedaa kharashka lagu bixiyo iibka iyo dayactirka hantida joogtada ah, oo ay ku jiraan kharashyada ay ka mid yihin kuwa tababarada iyo adeegyada latalinta.
5. “Gedab “waxaa loo la jeedaa waajibaadka noqonaya qaan hadiiba ama marka shuruudaha heshiis jiray ama sharci la fuliyo.

## XEERKA QOONDAHA MIISAANIYADDA 2022-KA

6. "Wasiir ama wasaarad" waxaa loo laa jeedda wasiirka maaliyadda ama wasaaradda maaliyadda hadba sida ay tahay.
7. "Xafiis dawladeed" waxaa loo laa jeedaa xafiis kasta oo ka mid ah Dowladda Federalka Soomaaliya oo guud ahaan ama qayb-ahaan looga qoondeeyo miisaniyadda Dowladda ee bayaankan lagu xeeriay.
8. "Kala wareejin" waxaa loola jeedaa ogolaanshaha kala warejinta Miisaaniyadda la qoondeeyey, lagana wareejiyo cinwaan, farac cinwaan mashruuc ama walax kharasheed laguna wareejiyo mid kale.
9. "Qaansheegatada" waxaa loola jeedaa shirkadaha ama shaqsiyaadka hay'adaha dowladda siiya adeeg ama agab.
10. "Xariiqda-Hoose" haraaga dib u bixinta qaamaha looma diiwaangaliyo dakhli ama kharash balse waxaa loo adeegsan karaa iyo lagu dheelitiro faraqa xisaabta dowladda, waxaana loo yaqaan dhacdo maaliyadeedka xariiqda-hoose, taa waxaa ka soo horjeeda Xariiqda-Sare taasoo loo adeegsado dhacdooyinka maaliyadeed ee saameynta ku leh haraaga lacagta (Dakhli ama Kharash).
11. "SDR" waxaa loola jeedaa lacagta ay isticmaasho hay'adda lacagta aduunka (IMF) waxaana laga soo gaabiyyey Special Drawing Rights.

### **1.2 Wadarta Miisaaniyadda La Qoondeeyey**

Miisaaniyadda Dowladda Fedaraalka Soomaaliya ayaa si ay u meel-mariso hawlahu u qorshaysan Sanad misaaniyadeedka ka billaabma 1-da Janaayo 2022-ka kuna dhamaada 31, December 2022-ka, ayaa sida hoos ku xusan looga qoondeeyay dakhliga khasnadda iyo lacagaha kale ee Dowladda, sida lagu qeexay jadwalkan. Wadarta Miisaaniyadda ee loo qoondeeyey Miisaaniyadda Joogtada iyo tan Raasumaalka ah ayaa ah sidan hoos ku xusan: -

B) Kharashka Joogtada ah	US <b>444,461,123</b>
T) Kharashka Raasumaalka ah	<b>US\$ 485,463,404</b>
<b>Wadarta Guud Ee Miisaaniyadda</b>	<b>US\$ 929,924,527</b>

## **2 Qaybta Labaad Maamulka Miisaaniyadda**

### **2.1 Awoodaha Xafiisyada Dowladda Federaalka Soomaaliya**

1. Wasiirka maaliyadda waxaa loo Awood siiyay in uu fasaxo una qaybiyo dakhliga Dowladda Soomaaliya iyo lacagaha kaleba, cadadka halkan loogu qoondeeyay xafiisyadooda marka ay soo codsadaan mas'uuliyiinta xafiisyada Dowladda Federalka Soomaaliya ee ay khusayso, si ay hawlahooda ugu fushadaan.

## **XEERKA QOONDAHA MIISAANIYADDA 2022-KA**

---

2. Xafiisyada Dowladda waxaa loo awood siiyay in ay diwaan-galiyaan ciwaanka Miisaaniyadda la qoondeeyey, farac ciwaanka, mashruuca ama barnamijaya xafiisyada, kolba kuu yahay. Waana inuu talaabada lagama-maarmaanka ah ka qaataa adeegsiga deynta ama deeq kasta oo dheerada, haday tahay mood ama lacag oo laga helo illaha gudaha ama dibadda looguna talogalay fulinta miisaaniyadda mashariicda ama miisaaniyadda joogtada ah. Sidoo kale, waxa lagama maarmaan ah in bil ka hor dhammaadka sannad miisaaniyadeedka loo gudbiyo warbixin Wasaaradda.
3. Dhamaan kharashaadkii la galay in lagu guda jiray Miisaaniyadda ku meel gaadhka ahayd ee January ilaa May way qeyb ka yihiin Miisaaniyadda 2022 ee la ansixiyey.

### **2.2 Miisaaniyad Wareejin**

1. Miisaaniyadda Joogtada ah waxaa loo wareejin karaa Misaaniyadda Mashaariicda.
2. Miisaaniyadda Mashaariicada looma wareejin karo Miisaaniyadda Joogtada ah.

### **2.3 Miisaaniyad Wareejinta Xafiiska Dhexdiisa**

1. Wasiirku wuxuu xafiis dhexdiis: -
  - B. Kala wareejin karaa kharashka Miisaaniyadda joogtada ah walax walax haddii ay isku madax yihiin
  - T. Ka wareejin karaa Miisaaniyadda mashruuc kuna wareejin karaa mashruuc kale.
2. Wasiirku wuxuu u xilsaari karaa mas'uulka xafiiska Dowladda ee ku habboon oo ka tirsan Wasaaradda Maaliyadda in uu meel-mariyo ama fuliyo xilka iyo Awooddha lagu siiyay qodob-hoosaadka 1aad ee kor ku xusan.

### **2.4 Miisaaniyad Wareejinta Xafiisyada Dhexdooda**

1. Wasiirku wuxuu wareejin karaa Miisaaniyadda joogtada ah ee loo qoondeeyay xafiis dawladeed in loo wareejiyo xafiis kale, kadib marka la xaqijiyo in xafiiska loo qoondeeyay Miisaaniyadda aanu wada istic-maali karayn Miisaaniyadaas.
2. Wasiirku wuxuu amri karaa in Miisaaniyadda Mashaariicda ee loo qoondeeyay xafiis, loo wareejiyo mashruuc xafiis kale. Kadib marka la xaqijiyo in Miisaaniyad yaraanta xafiiska laga dabooli karo miisaaniyad mashaariic oo loo ansixiyey sanadkaas xafiis kale oo dowladeed.

### **2.5 Wareejinta Miisaaniyadda kaydka**

1. Wasiirku wuxuu awoodiisa ku amri karaa in Miisaaniyadda kaydka loo wareejiyo loona istic-maalo kharash deg-dega ah kadib marka ay dhacaan hawlo gurmadi deg-deg ah, oo uu baahan kharash deg-deg ah, oo aan baahidoodu horay u muuqanin wakhtiga la

## XEERKA QOONDAHA MIISAANIYADDA 2022-KA

diyaarinayay Miisaaniyadda sanadka. Kolka uu wasiirka ansixiyo soo wareejinta kharashka keydka kabidda waxaa lagu wareejinayaay hay'adda ka mas'uulka ah. Wasiirka ayaa si joogta ah u siin doona Golaha Shacabka warbixin ku aadan kharashka laga wareejiyey keydka kabidda.

2. Kharashka kaydka lama filaanka waxaa keliya oo loo isticmaali karaa xaalad degdeg ah sida fatahaado, abaro, cuduro dilaacay ama kharashaad kale aan muuqan kolkii miisaaniyadda la diyaarinayey iyo IWM, looma isticmaali karo baahida kharashka caadiga ah ee xafiisyada Dowladda.

### **2.6 Miisaaniyadda Kabista**

Golaha sharci dajintu isagoo ka duulaya tala bixinta golaha fulinta ayuu meel mariyaa Miisaaniyadda kabista ah.

### **2.7 Gashibaxa/Qaan Bax**

Gashibaxa iyo Amaahda sharcieysan ee laga dhaxlay Miisaaniyadda 2020-ka ayaa noqoneysa gashibax u gudbeysa sanadka 2022-ka, waxayna noqoneysaa qeyb ka mid ah mudnaanta kharashka, Wasiirka ayaa u xilsaaran xaqijinta dhamaan qaamaha iyo gashibaxa kuwooda sharciga ku qotoma iyo kuwa hareer marsan.

### **2.8 Qaamaha**

1. Wasiirka oo kaliya ayaa awood u leh amaahda Gudaha iyo dibadda lagu qaadayo magaca dowladda federaalka ah asagoo raacaya habraacyada iyo shuruudaha lagu qeexay qodobka 36aad ee sharciga maareynta maaliyadda Lr. 17 December 25, 2019.
2. Dowladda Federaalka Soomaaliya ma gali kartu wax qaan ah gudaha ama dibadda marka laga reebo wadiiqadaha SDR (Special Drawing Rights) ee IMF lagula jiro iyo lacago horumaris yar yar eel aga amaahdo banka dhewe ee soomaaliya ayna tahay in lagu bixiyo isla sanad Miisaaniyadeedka gudihiisa.
3. Dhaqaalaha ka yimaada deymaha waxaa lagu diiwaangalinayaay xariiqda-hoose ee xisaabaadka (Below-the-line transactions), dhaqaalaha noocaas ah looma aqoonsan doono dakhli ama Kharash.
4. Bixinta dulsaarka deymaha waxaa lagu diiwaan galin doonaa xariiqda-sare xisaabaadka (above the line transactions) qaab Kharash ah.

### **2.9 Isticmaalka SDR Ee Wasaaradda**

1. Iyadoo laga duulayo qodobka 8<sup>aad</sup> iyo faqradiisa 3<sup>aad</sup> ee sharciga maareynta maaliyadda, Wasiirka ayaa mas'uul ka ah maamulka, hantida iyo qaamaha la xidhiidha isticmaalka lacagta SDR (special Drawing Rights).
2. Si looga fogaado hubanti la'aan waxaa halkan lagu qeexaya: -

## **XEERKA QOONDAHA MIISAANIYADDA 2022-KA**

---

- a) Hantida iyo qaamaha la xidhiidha lacagta SDR ee Wasaaradda waxaa iska leh Dowladda Federaalka ah ee Soomaaliya mana noqon karto qeyb ka mid ah hantida ama qaamaha Banka Dhexe Ee Soomaaliya;
- b) Qaanta dulsaarka ee ku waajibtay qoondada Wasaaradda waxaa lagu leeyahay dowladda federaalka ah Soomaaliya, lagumana dalacayo SDR uu hayo Banka dhexe ee Soomaaliya
3. Wasiirka waxa uu u istcmaali karaa lacagta SDR Wasaaradda kaliya kharashaadka mudnaanta lagu siiyey qodobka 3.1 faqradiisa 1<sup>aad</sup> marka ay timaado hoos u dhac dakhli;
4. Haraaga lacagta SDR ee Wasaaradda la siiyey kama yaraan karto 3 malyan ee unit-ka SDR.
5. Wasiirka wuxuu ka habeynayaan dulsaarka qoondada haraaga Wasaaradda ee SDR-ka marka loo baahdo in la maareeyo cadadka kor lagu xusan faqrada 4<sup>aad</sup>.
6. Waa in lagu lifaaqaa xisaab xirka sanadlahaa ee Dowladda Federaalka Soomaaliya lifaaq sharaxaya haraaga taagan ee lacagta SDR-ka iyo qoondada u harsan Wasaaradda iyo isbadal kasta oo dhaca inta lagu guda jiro sanad maaliyadeedka.

### **3 Qaybta Sedexaad** **Kharash Bixin**

#### **3.1 Mudnaanta Kharash Bixinta**

1. Haddii ay timaado hoos u dhac dhanka dakhliga ama deeqaha wasaaraduna fulin weyso dhamaan kharashaadkii loogu talagalay Miisaaniyadda sanadka 2022-ka, waxaa mudnaanta bixinta kharashka loo raacayaa sida ay u kala horreyaan ee hoos taxan.
  - a) Raashinka iyo Gunnooyinka Ciidamada qalabka sida
  - b) Khidmadaha Maaliyaddu ku shaqeysyo (Khidmadda Banka, Goboka iyo Dulsaarka)
  - c) Mushaarooyinka/gunnooyinka Shafaalah Rayidka ah
  - d) Gunnada Xildhibaanada iyo G/Wasiirada
  - e) Mushaharka iyo gunnooyinka Gashibaxa ku jira ee kasoo wareegay miisaaniyada sanadkii hore
  - f) Adeegga iyo Agabka Xafiisyada Dowladda qaran iyo gobolbada
  - g) Gashibaxa Alaabta iyo Qaamaha la hormarsaday
- 2.

## **XEERKA QOONDAHA MIISAANIYADDA 2022-KA**

---

### **3.2 Dhito**

1. Dhakhliga iyo Deeqaah Dowladda Federalka Soomaaliya hesho waa in la dhigaa Khasnadda Dhexe ee Dowladda Soomaaliya 24 saacadood gudahooda oo ka bilaabanaysa marka la qabtay, haddii aysan ku soo aadin maalin aan la shaqaynaynin oo leh tixgelinteeda waqtii.
2. Bangiga dhexe waa in uu aqbalaa qabashada dakhliga dawladda, islamarkaana uu meel-mariyo kharash bixinta isagoo isticmaalaya xisaabta Dowladda Federalka ah ee bankiga ka furan.

### **3.3 Lacagta Laga Bixiyo Miisaaniyadda Duuduubka**

1. Iyada oo aanu golaha sharci dajintu ogolaan, wax kharash ah lagama bixin karo Miisaaniyadda duuduubka ah.
2. Lagama gali karo kharash ama gedab Miisaaniyadda la ansixiyey, ka hor inta aanu ansixin ama qoondayn wasiirku.
3. Dhamaan bixinta qorsheysan waa in ay si toos ah oga baxdaa khasnadda dhexe una aadaa qaansheegatada ayadoo mareyn hay'adaha adeegga ama agabka la siiyey.
4. Dhamaan qabashada iyo bixinta lacageed ee miisaaniyadda waa in ay martaa hab-xisaabeedka dowladda (SFMIS) si elektroonik ah, ka dibna la waafajiyaa warbixin xisaabeedka Bangiga Dhexe.
5. Dhamaan bixinta qaansheegatada iyo qandarasleyaasha waa in ay martaa barnaamij xisaabeedka dowladda (SFMIS), lagana bixiyaa madax iyo madax-xigeenada ku haboon ee khasnadda dhexe ee dawladda si toos ah uu u qaato qofka iyo shirkadda qaansheegtada ah.
6. Haddii hay'ad loo sameeyo hormaris lacageed sababo la xidhiidha kharash maamul, horumariska waxaa loo diiwaangalinaya sida hanti la bixiyey, ka dibna waa in la kharash gareeyo. Lama fasixi karo hormaris kale ayadoo la kharash gareyn kii hore.
7. Si loo kharash gareeyo hormaris lacageed ee taagan dhamaan hay'adaha dowladda waa in ay u keenaan Wasaaradda xogaha iyo xaashiyaha biilasha iyadoo la socoto dalab kharash gareyn si kharash kasta loogu diiwaangaliyo madax xigaha ku haboon.

### **3.4 Xaddiga kharash Bixinta**

1. Marka laga reebo sida ku xusan qodobada 2.2 ilaa 2.5, ma jirto hay'ad kharash gareyn karta sanadka gudihiisa, qoondada loogu qoondeeyey xeerkan ee sanadka.
2. Wasiirka ayaa qeexi doona lacagaha gacan ku haynta ah, hadhaaga xisaab kasta waxay ku jaango'naan doonta xadiga Wasiirka jaangooyo.

## XEERKA QOONDAHA MIISAANIYADDA 2022-KA

### **3.5 Gedab**

1. Wax gedab ah lagama gali karo qoondaha, kaliya inuu soo codsado Mas'uulka xafiiska Dowladda ama cid uu qoraal ku wakiishay mooyee.
2. Madax kasta oo xafiis dawladeed magali karo heeshiis ama nidaam kale oo uu baahan kharash, kaliya marka ay jirto hadhaa aan qaan ahayn oo ku filan in ay dabooshoo deynta lagali doono sanad miisaaniyadeedka 2022.
3. Wasaaraddu waxay aasaasi doontaa habraaca la raaco iyo hab diwaaneed qoraya dabagalka gedebka maaliyadeed ee walax miisaaniyadeed kasta.
4. Madaxa xafiiska dawladdu wuxuu yeellan doonaa diiwaanno lagu hubiyo gedabyada maaliyadeed ee walax kharasheed kasta habka uu u xeerihey wasiirku.

### **3.6 Lacag Bixinta Agabka iyo Adeegga**

1. Ka sokow foojarada kale ama cadaymaha loo bahan yahay, Xafiis kasta oo dawladeed ma bixin karo lacag illaa uu xaqijiyo ama hubiyo madaxa xafiisku ama cidda kale ee uu madaxa xafiisku u xil saaray.

**B.** Marka lacag bixintu tahay mid la xidhiidha hawl u baahan in la qabto, Allaab keenid ama addeeg.

I. Waa in ay tahay shaqada laqabtay, allaabta la keenay ama adeegga la bixiyay & qiimaha la saaray mid waafaqsan heeshiiska ama haddii ayna heshiiska ku caddayn noqdaa mid macquul ah.

II. Waa in ay noqoto mid-waafaqsan shuruudaha heeshiiska kharash bixintu, ka hor inta aan la dhammaystirin shaqada, aan la soo xarayn allaabta ama la helin adeegga

III. Waa in ay ahaato kharash bixinta mashaariicdu mid waafaqsan nidaamka iyo awaamiirta u deggan Wasaaradda, islamarkaana mac-quul ah oo sugar: Ama

**T.** Lacagta kharash kasta oo kale waa in ay ahaato mid uu lacag-qaatuhu xaq u-leeyahay, qaadashada lacagta uu qaatay.

2. Wasaaraddu waxay soo saari kartaa nidaam lagu xaqijinayo ama hubbinayo xaqiqda cadaymaha uu u baahan yahay qodobkani.
3. Xafiisyada Dawladdu waxay yeelan doonaan sanduuq ay ku kayd sadaan lacagta hawl fulinta cadadka yar, cadadka lacageed ee loo istic-maali doono hawl-fulin waxaa go'aamin doona wasiirka.

### **3.7 Lacagta aan la Ithic-maalim**

1. Iyadoo lagu xeerin doono wareegtooyin ay wasaaraddu soo saarto ayaa waxaa lagu celin khasnada dhexe hadhaaga Miisaaniyadda la qoondeeyey ee sanad

## **XEERKA QOONDAHA MIISAANIYADDA 2022-KA**

---

Miisaaniyadeedku ka dhacay, aan la istic-maalina. Wuxaana lagu kordhinayaa sanduuqa qasnada dhexe ee wasaaradda.

### **3.8 Dhicitaanka Qoondoonyinka Dhamaadka Sanad Xisaabeedka**

1. Dhamaan qoondoonyinka aan la isticmaalin iyo kuwa aan la gadbin ee Miisaaniyadda la qoondeeyey waa dhacayaan dhamaadka sanad maaliyadeedka.
2. Dhamaan lacagaha aan la bixin ee laga gadbay Miisaaniyadda la qoondeeyey aanse la bixin ka hor dhamaadka sanad maaliyadeedka waxaa loo diyaarinayaa in lagu bixiyo muddo aan ka badneyn 30 cisho laga soo bilaabo dhamadka sanadka tagay, haddaba, tani waxay ku xidhnaan doonta awoodda dakhli iyo ogolaanshaha Xisaabiyaha Guud.
3. Diiwaangalinta, xisaabinta iyo warbixinada lacagaha aan la bixin waxaa lagu qeexi doonaa habraac lagu soo saarayo wareegtada dhaqagalinta Miisaaniyadda, wax gadeb ah lama gali karo wixii ka danbeeya 10<sup>th</sup> December.

### **3.9 Warbixin Xisaabeedka**

1. Dhamaan Hay'adaha Dowladda waa in ay u keenaan Xisaabiyaha Guud iyo Agaasimaha Guud ee Wasaaradda dhamaan xisaab xidhka kharajka iyo dakhliga ee bishaas ugu danbeyn 7da bisa xigta iyadoo la raacayo qaabka uu tilmaami doono Xisaabiyaha Guud. Waxaa awood loo siiyey Wasaaradda inay hakiso bixinta qoondaha ee miisaaniyadda ee hayadaha keeni waaya xisaab-xirka billaha ah.
2. Maamul goboleedyada iyo Gobolka Banaadir waxaa laga doonaya in ay soo xisaab celiyaan isticmaalka lacagaha dowladda dhexe oga wareejisay Miisaaniyadda muddo saddex biloodle ah bil gudaheed dhamaadka saddex biloodlah;
3. Wasiirka wax lacag ah uma wareejin doono maamulka aan soo xisaab celi xisaabtii hore ee ku xusan faqrada 2<sup>aad</sup> ee sare ku xusan;
4. Warbixinta Miisaaniyadda ayaa si bille iyo rubac sanadle ah lagu daabici doonaa website-ka Wasaaradda, xilliga kama danbeysta ah ee bilkasta lagu daabacayo warbixinta, wasiirka ayaa ku soo saari doona wareegto.

## XEERKA QOONDAHA MIISAANIYADDA 2022-KA

### 4 Qayabta Shanaad Qoondaynta Miisaaniyadda

#### 4.1 Qoondaynta Miisaaniyadda Xafiisyada Dowladda

1. Miisaaniyadda hoos ku xusan waxaa loo qoondeeyay xafiisyada Dowladda sanad Miisaaniyadeedka 2022-ka, waana sida hoos ku xusan.
  - a) Miisaaniyadda Joogtada ah US\$ 444,461,123
  - b) Miisaaniyadda Raasumaalka US\$ 485,463,404

**Wadarta Guud** US\$ 929,924,527
2. Faah-faahinta qoondaha Miisaaniyadda waxay ku caddahay oo ay ku fahfaahsantahay xagga hoose ee bayaankan


#### 4.2 Canshuur Ururinta

Waxaa halkan ku lifaaqan tacrifada furdooyinka oo qeyb ka ah miisaaniyadan lana doonayo in lagu soo xareeyo dakhliga lagu fulin doono miissaaniyadda 2022.

#### 4.3 Muddada Dhaqan-galka

Yeerkanaan wuxuu dhaqangalayaa Maalinta Madaxweynaha Jamhuuriyadda Federaalka saxiixo.

Laga soo saaray Muqdhisho 13 malinta July, 2022

  
Madaxwaynaha  
Jamhuuriyadda Federaalka Soomaali

